



Број: 01/3-50-3-3-12/16

Сарајево, 15.12.2016.

## Z A B I L J E Š K A

### s radnog sastanka Komisije za vanjsku trgovinu i carine Predstavničkog doma PSBiH, održanog 15. decembra 2016. u Glavnom uredu UIOBiH

Na 12. sjednici Komisije za vanjsku trgovinu i carine (u daljnjem tekstu: Komisija), održanoj 2.11.2016., zaključeno je da će članovi Komisije u narednom periodu posjetiti regionalne centre Uprave za indirektno oporezivanje BiH, počev od RC Tuzla, o čemu će blagovremeno obavijestiti UIOBiH, a povodom dopisa špeditera i firmi uvoznika polovnih motornih vozila s područja Regionalnog centra Tuzla.

Nakon sastanaka u svim regionalnim centrima UIO, održan je sastanak i u Glavnom uredu UIO Banja Luka.

Nakon sastanka u RC Banja Luka, sastanak u Glavnom uredu počeo je u 12,30 sati.

Sastanku su prisustvovali: Šemsudin Mehmedović, predsjedavajući Komisije, Nenad Lalić, prvi zamjenik predsjedavajućeg Komisije, te članovi Komisije: Mensura Beganović, Miroslav Milovanović, Mirsad Mešić, Mirjana Crnjak, sekretarka Komisije, Radomir Marjanović, stručni savjetnik u Komisiji, i Zoran Žuža, šef Odjela za informiranje Sektora za odnose s javnošću u Sekretarijatu PSBiH.

Opravdano su odsustvovali: Nikola Lovrinović, Safer Demirović, Nikola Špirić i Zaim Backović.

Iz Glavnog ureda UIO Banja Luka sastanku su prisustvovali: Zdravko Cvjetinović, pomoćnik direktora Sektora za carine, Milomirka Došenović, šefica Odsjeka za upravljanje ljudskim potencijalima, Dženan Musemić, šef Odsjeka za tarifu, vrijednost i porijeklo robe, Miljka Kutić, šefica Odsjeka za carinske postupke, Almedin Ugarak, šef Odsjeka za kontrolu, Zagorka Gojković, šefica Odsjeka za zaštitu intelektualne svojine, zabrane i ograničenja i Zoran Popović, v.d. šefa Odsjeka za carinsku laboratoriju.

Sastanku se naknadno priključio i direktor UIO Miro Džakula.

U ime Komisije Šemsudin Mehmedović pozdravio je prisutne i obavijestio ih da su održani sastanci u svim regionalnim centrima UIO, a da je potreba za organiziranjem sastanaka potaknuta dopisom špeditera i firmi uvoznika polovnih motornih vozila s područja Regionalnog centra Tuzla u kojem navode neravnopravan odnos i status u vezi s nekim instrukcijama datim pojedinačno, a suprotne su Zakonu o carinskoj politici.

Također je kazao da ovo nije nikakva istražna komisija, nego da se članovi Komisije žele upoznati sa uslovima rada i problemima s kojima se UIO susreće, finansijskim rezultatima poslovanja, brojem zaposlenih, nacionalnom strukturom po RC-u kao i načinom rješavanja problema carinjenja automobila, tekstila, alkoholnih pića, kafe, odnosno visokoakcizne robe, kao i problemima u tarifiranju keksa, odnosno čokolade, dodajući da Komisija želi pomoći UIO u skladu sa svojom nadležnošću.

Također, potrebno je da se Komisija upozna s podacima i trendovima kretanja robe s kompletnom analitikom po vrstama proizvoda koji se uvoze, po vrstama i visini carinskih obaveza, po regionalnim centrima, carinskim ispostavama i sl. O svemu ovome potrebno je razgovarati te dostaviti Komisiji i pisani materijal, u što kraćem roku. Komisija će nakon sublimiranja i razmatranja zabilješki o posjetama iz svih RC-a UIO sačiniti i usvojiti zaključke i postupiti u skladu sa svojom nadležnošću s ciljem unapređenja rada UIO BiH, kazao je predsjedavajući Komisije.

Dobrodošlicu članovima Komisije poželio je Zdravko Cvjetinović, pomoćnik direktora Sektora za carine, i istakao da Uprava za indirektno oporezivanje po određenim stručnim pitanjima ostvaruje saradnju s Ministarstvom vanjske trgovine i ekonomskih odnosa BiH, te Evropskom komisijom - DG TAXUD (Generalni direktorat za poreze i carinsku uniju pri Evropskoj komisiji).

Naglasio je da UIO radi veoma odgovoran posao, ima mnogo zaposlenih, veliki promet robe, pogotovo uvozne, četiri regionalna centra, veliki broj carinskih ispostava pa je razumljivo da u radu ima problema svih vrsta pa i u međuljudskim odnosima. U ovom momentu postoji problem grube zloupotrebe i narušavanja odnosa šefa Odsjeka za carine iz Tuzle koji će rješavati nadležni državni organi i organi Uprave.

Što se tiče pitanja vezanog za broj zaposlenih, s nacionalnom strukturom, po regionalnim centrima UIO, odgovor je dala Milomirka Došenović. Istakla je da je u UIO ukupno zaposleno 2463 ljudi, sa stanjem na današnji dan, od ukupno 2716 sistematiziranih radnih mjesta i da je nepopunjeno oko 300 radnih mjesta, te da je poseban problem to što je više od 100 zaposlenih svakodnevno opravdano odsutno s posla.

Istakla je da je nacionalna struktura zaposlenih različita po regionalnim centrima i da najviše zavisi od strukture stanovništva koje živi na području gdje se nalazi regionalni centar.

Za potrebe informiranja i analiza, članovima Komisije uručen je Pregled nacionalne strukture zaposlenih u UIO BiH i Sektoru za carine, koji je u prilogu ove zabilješke i čini njen sastavni dio.

Nenad Lalić zamolio je komentar prisutnih iz Uprave u vezi sa stanjem duga fabrike cijevi iz Dervente, odnosno mišljenje kako je stvoren toliki dug ako carinske službe uredno funkcioniraju.

Na ovo pitanje nije bilo direktnog odgovora, ali je istaknuto da su sigurno napravljeni propusti i da će nadležne državne institucije ispitati odgovornost i propuste svih i potom imati jasan odgovor na ovo pitanje.

U daljnjoj raspravi i postavljanju pitanja učestvovali su: Šemsudin Mehmedović, Nenad Lalić, Mensura Beganović i Miroslav Milovanović, a određene odgovore i pojašnjenja davali

su iz UIO: Milomirka Došenović, Zdravko Cvjetinović, Miljka Kutić, Zagorka Gojković, Dženan Musemić, Almedin Ugarak i Zoran Popović.

Mensura Beganović postavila je pitanje vezano za laboratorijsku kontrolu robe koja se uvozi i carini i da li postoji mogućnost laboratorijske kontrole u Banjoj Luci, a koliko se robe kontrolira u ostalim dijelovima BiH, koliki su troškovi i kakva je opremljenost laboratorija.

Zoran Popović, v.d. šefa Odsjeka za carinsku laboratoriju, odgovorio je na postavljeno pitanje istakavši da je u Banjoj Luci uspostavljena carinska laboratorija koja je opremljena za analize preko 50% proizvoda koji se uvoze. Za analize koje se ne mogu uraditi u vlastitoj laboratoriji tenderom se bira najpovoljniji ponuđač, te se tako rješavaju pitanja potrebnih analiza, a za koje Uprava nije tehnički opremljena.

Kasnije se sastanku priključio i direktor UIO Miro Džakula.

Izražavajući zadovoljstvo posjetom, direktor UIO BiH Miro Džakula informirao je članove Komisije o tome da je Uprava u ovoj godini prikupila oko 6,6 milijardi konvertibilnih maraka, čime je zabilježila značajno veće prihode od indirektnih poreza i carina u odnosu na prošlu godinu.

Istakao je da traži da se u UIO radi odgovorno i transparentno, a da od zaposlenih traži i maksimalnu privrženost instituciji, izražavajući žaljenje što se Upravi ne odobrava zapošljavanje na upražnjena radna mjesta, jer je nepopunjeno oko 300 radnih mjesta, te da se radi o instituciji koja značajno doprinosi redovnom punjenju budžeta institucija na svim nivoima vlasti u BiH. Također je izrazio žaljenje što je UIO zahvatila siva ekonomija, kao i problem plaćanja odvojenog života. Pravo na troškove odvojenog života imaju šefovi, a zaposleni carinici nemaju, što će u dogledno vrijeme sigurno još nepovoljnije uticati na nacionalnu strukturu zaposlenih u UIO, istakao je direktor Miro Džakula.

Nakon rasprave, predsjedavajući Komisije Šemsudin Mehmedović obavijestio je prisutne da će Komisija na osnovu saznanja sa sastanaka u regionalnim centrima, u skladu sa svojom nadležnošću, sačiniti i usvojiti zaključke s ciljem unapređenja rada UIO BiH.

Sastanak je završen u 14.30 sati.

Sekretarka Komisije  
**Mirjana Crnjak**

Predsjedavajući Komisije  
**Šemsudin Mehmedović**